



**GARIS PANDUAN PENGUATKUASAAN
KEMPEN HARI TANPA BEG PLASTIK PERCUMA
NEGERI PULAU PINANG
2017**

1.0 TUJUAN

Garis Panduan Penguatkuasaan Kempen Hari Tanpa Beg Plastik Percuma Negeri Pulau Pinang 2017 (*Plastic Bag 2.0*) disediakan bertujuan sebagai asas panduan serta rujukan bagi pematuhan kepada semua premis perniagaan yang dikategorikan terlibat dengan pelaksanaan kempen tersebut. Penyediaan Garis Panduan Penguatkuasaan Kempen Hari Tanpa Bag Plastik Percuma juga bertujuan menyediakan panduan kepada semua pihak berkepentingan (*stakeholders*) bagi pelaksanaan kempen secara bersepadu dan holistik.

2.0 LATAR BELAKANG

Kerajaan Negeri Pulau Pinang selaras dengan dasar *Cleaner, Greener, Safer, Healthier & Happier Penang* berhasrat untuk menjadikan Pulau Pinang sebagai sebuah negeri yang bersih, mempunyai alam sekitar yang hijau dan mampan, selamat untuk didiami dan mempunyai masyarakat serta persekitaran yang sihat. Berteraskan kepada dasar ini, pelbagai usaha telah dilaksanakan bagi memelihara, memulih serta mempertahankan alam sekitar dan ekosistem di Negeri Pulau Pinang.

Penggunaan beg plastik tanpa kawalan mampu memberi ancaman besar kepada alam sekitar dan kesihatan jika tiada perancangan yang teliti mengenai pengurusan penggunaan bahan plastik tersebut. Beg plastik mengambil masa 400 hingga 1000 tahun untuk mereput sepenuhnya sebelum ia menjadi partikel halus. Beg plastik biasanya dihasilkan dari bahan kimia bertoksik seperti xylene, ethylene oxide dan benzene yang mampu memudaratkan alam sekitar dan kesihatan. Justeru itu, Kempen Hari Tanpa Beg Plastik Percuma telah diperkenalkan di Pulau Pinang sebagai salah satu teras utama dalam pelaksanaan dasar *Cleaner, Greener, Safer, Healthier & Happier Penang*.

3.0 OBJEKTIF

Objektif utama pelaksanaan kempen *Plastic Bag 2.0* adalah bertujuan:-

- (i) Mengurangkan kuantiti penggunaan jumlah beg plastik yang memudaratkan alam sekitar;
- (ii) Meningkatkan kesedaran dalam memelihara alam sekitar;
- (iii) Menjadikan Pulau Pinang sebagai Negeri Hijau;
- (iv) Mengurangkan perbelanjaan negeri bagi kos pelupusan sisa pepejal melibatkan beg plastik; dan

- (v) Sebagai tindakbalas ke atas kajian yang menunjukkan bahawa peningkatan kes banjir kilat dan demam denggi adalah disebabkan oleh pembuangan beg plastik secara berleluasa ke laluan air dan parit.

4.0 PRINSIP DAN KONSEP

Secara asasnya, Kempen Hari Tanpa Beg Plastik Percuma akan menggunakan prinsip dan konsep yang masih mengekalkan kenaaan **caj sumbangan kutipan bagi setiap helai beg plastik** yang dibekalkan kepada pengguna di kaunter bayaran premis-premis perniagaan yang ditetapkan. Hasil caj sumbangan kutipan yang diperolehi dari jualan beg plastik tersebut mesti diserahkan kepada Kerajaan Negeri Pulau Pinang melalui Pihak Berkuasa Tempatan (PBT).

Beg plastik merujuk kepada sebarang bentuk beg yang dibekalkan kepada pengguna di kaunter bayaran, di mana komponen asasnya diperbuat daripada plastik (polimer sintetik/semi sintetik) dan juga termasuk beg plastik bio-degradasi (*bio-degradable plastic bag*). **Plastik bagi pembungkusan (*wrapper*) produk/minuman/makanan tidak termasuk sebagai kategori beg plastik yang dikenakan caj sumbangan kutipan dalam kempen ini.**

Pelaksanaan dan kadar caj sumbangan kutipan beg plastik yang dikenakan berkuatkuasa 1 Januari 2021 adalah seperti berikut:-

- **RM1.00** bagi setiap helai beg pada setiap hari **Khamis, Jumaat, Sabtu dan Ahad**; dan
- Tiada beg plastik yang akan dibekalkan oleh premis-premis perniagaan terlibat pada setiap hari Isnin, Selasa dan Rabu sempena Kempen Hari Tanpa Beg Plastik Negeri Pulau Pinang (*No Plastic Bag Day*).

Nilai RM1.00 yang dikenakan kepada pengguna adalah tidak termasuk cukai barangan dan perkhidmatan.

Caj sumbangan kutipan terkumpul yang diterima oleh Kerajaan Negeri Pulau Pinang akan disalurkan **ke Akaun Tabung Amanah Kebajikan Negeri Pulau Pinang** bagi kegunaan program-program kebajikan masyarakat di Pulau Pinang.

Pemberian beg plastik dan caj RM1.00 adalah **tidak dibenarkan** pada hari yang diisytiharkan oleh Kerajaan Negeri sebagai hari bebas beg plastik melalui Kempen Hari Tanpa Beg Plastik (*No Plastic Bag Day*).

5.0 PUNCA KUASA

Pelaksanaan *Plastic Bag 2.0* adalah melalui syarat tambahan permohonan baharu atau pembaharuan lesen perniagaan di bawah peruntukan Seksyen 107 (2) Akta Kerajaan Tempatan 1976 iaitu:-

“Tiap-tiap lesen atau permit yang diberi tertakluk kepada apa-apa syarat dan sekatan yang difikirkan patut oleh pihak berkuasa tempatan dan boleh dibatalkan oleh pihak berkuasa tempatan pada bila-bila masa tanpa memberi apa-apa sebab.”

Berdasarkan sub-seksyen ini, PBT mempunyai kuasa untuk mewajibkan premis perniagaan supaya turut serta dalam Kempen Hari Tanpa Beg Plastik Percuma Negeri Pulau Pinang.

6.0 GARIS PANDUAN PENGUATKUASAAN

6.1 PENDAFTARAN

- (i) Premis perniagaan yang wajib berdaftar dengan Pelaksanaan *Plastic Bag 2.0* adalah terdiri daripada semua premis perniagaan sedia ada dan premis perniagaan baharu yang akan mula beroperasi dalam kategori berikut:-
 - (a) Pasaraya Hyper (*Hypermarket*);
 - (b) Pasaraya Besar (*Supermarket*);
 - (c) Pasaraya Serbaneka (*Departmental store*);
 - (d) Kedai Serbaneka (*Convenient store*);
 - (e) Restoran Makanan Segera (*Fast Food Restaurant*);
 - (f) Kedai Serbaneka Stesen Minyak (*Petrol Station Convenient Store*);
 - (g) Kedai Rangkaian (*Chain Store*);
 - (h) Farmasi (*Pharmacy*); dan
 - (i) Lain-lain premis perniagaan berkaitan yang akan dimasukkan ke dalam senarai ini pada masa akan datang (*Others*).
- (ii) Pasar awam dan penjaja adalah dikecualikan.
- (iii) Setiap premis perniagaan yang disenaraikan dibawah para 6.1 (i) **sama ada membekalkan atau tidak membekalkan beg plastik kepada**

pengguna perlu berdaftar dengan pihak berkuasa tempatan (PBT) berikut:-

- Majlis Bandaraya Pulau Pinang (MBPP); atau
 - Majlis Bandaraya Seberang Perai (MBSP)
- (iv) Premis perniagaan yang memohon lesen premis perniagaan di dalam kawasan pentadbiran MBPP perlu berdaftar dengan MBPP dan premis perniagaan yang memohon lesen premis perniagaan di kawasan pentadbiran MBSP perlu berdaftar dengan MBSP.
- (v) Setiap premis perniagaan sedia ada di bawah kategori para 6.1 (i) diberi tempoh selama **30 hari** untuk membuat pendaftaran dalam kempen *Plastic Bag 2.0* bermula dari **1 Mac 2017 sehingga 31 Mac 2017**.
- (vi) Setiap premis perniagaan baharu di bawah kategori para 6.1 (i) yang baru memulakan perniagaan bermula **1 Mac 2017** dan seterusnya perlu serta merta berdaftar dengan kempen *Plastic Bag 2.0* serentak dengan permohonan lesen premis perniagaan melalui PBT yang berkaitan.
- (vii) Satu pendaftaran adalah untuk satu premis perniagaan. Perniagaan yang mempunyai cawangan perlu mendaftarkan setiap cawangan secara individu berdasarkan lesen premis perniagaan yang dikeluarkan oleh PBT.
- (viii) Lokasi bagi pendaftaran adalah seperti berikut:-

(a) MAJLIS BANDARAYA PULAU PINANG

Bahagian Pelesenan MBPP
Dewan Bandaraya,
Jalan Padang Kota Lama,
10200 George Town,
Pulau Pinang

(b) MAJLIS BANDARAYA SEBERANG PERAI

Kaunter Berpusat
Majlis Bandaraya Seberang Perai
Jalan PERDA Utama
Bandar PERDA
14000 Bukit Mertajam

- (ix) Masa pendaftaran adalah setiap **ISNIN hingga JUMAAT** dari jam **9.00 pagi hingga 4.30 petang**.
- (x) Setiap pendaftaran atau pembaharuan perlu menggunakan Borang PB-A (**LAMPIRAN A**) mengikut PBT masing-masing dan disertakan bersama sesalinan photostat:-
 - (a) Sijil Pendaftaran Syarikat (SSM); dan
 - (b) Lesen Premis Perniagaan.
- (xi) Setiap premis perniagaan yang berdaftar akan diberikan nombor pendaftaran kempen khusus yang perlu digunakan sebagai rujukan bagi setiap urusan yang melibatkan Kempen *Plastic Bag 2.0*.
- (xii) Nombor pendaftaran kempen khusus yang diberikan akan **KEKAL** dengan premis perniagaan selagi ianya masih beroperasi di lokasi yang sama. Pendaftaran baharu perlu dibuat sekiranya perniagaan berpindah.
- (xiii) Setiap premis perniagaan yang berdaftar dengan PBT akan diberikan **SIJIL PENYERTAAN PREMIS KEMPEN HARI TANPA BEG PLASTIK PERCUMA NEGERI PULAU PINANG (LAMPIRAN B)** yang membenarkan premis perniagaan membuat caj sumbangan kutipan RM1.00 bagi setiap helai beg plastik yang dibekalkan di kaunter bayaran kepada pengguna.
- (xiv) Sijil Penyertaan Premis Kempen Hari Tanpa Beg Plastik Percuma Negeri Pulau Pinang adalah eksklusif kepada perniagaan atau premis yang memohon dan tidak boleh dipinjam/pindahmilik kepada mana-mana perniagaan atau premis lain.
- (xv) Sijil Penyertaan Premis Kempen Hari Tanpa Beg Plastik Percuma Negeri Pulau Pinang mesti dipamerkan dengan jelas untuk dilihat oleh

pengguna sebagai bukti kebenaran untuk membuat caj sumbangan kutipan RM1.00 bagi setiap helai beg plastik yang dikeluarkan kepada pengguna.

- (xvi) Hanya premis perniagaan berdaftar sahaja dibenarkan untuk membuat caj sumbangan kutipan RM1.00 bagi setiap helai beg plastik yang dikeluarkan.
- (xvii) Premis perniagaan yang membuat caj sumbangan kutipan tanpa berdaftar dengan PBT akan dikenakan tindakan di bawah Seksyen 107 (2) Akta Kerajaan Tempatan 1976 melalui pembatalan lesen premis perniagaan.
- (xviii) Pendaftaran kempen hanya sah untuk tempoh satu (1) tahun dan perlu diperbaharui setiap tahun apabila tamat tempoh yang ditetapkan.
- (xix) Tempoh sah laku Sijil Penyertaan Premis Kempen Hari Tanpa Beg Plastik Percuma Negeri Pulau Pinang akan diselaraskan ke tarikh tamat Lesen Premis Perniagaan.
- (xx) Pendaftaran Kempen Hari Tanpa Beg Plastik Percuma perlu diperbaharui setiap tahun sebagai satu syarat bagi proses pembaharuan lesen perniagaan.

6.2 KAEDAH KUTIPAN

- (i) Setiap premis perniagaan yang telah berdaftar dengan Kempen *Plastic Bag 2.0* dibenarkan untuk mengenakan caj sebanyak RM1.00 bagi setiap helai beg plastik yang dibekalkan kepada pelanggan di premis perniagaan semasa membuat bayaran.
- (ii) Caj sumbangan kutipan terkumpul bagi penggunaan bag plastik di premis perniagaan terlibat dengan Kempen *Plastic Bag 2.0* perlu diserahkan kepada PBT sebelum 15 haribulan melalui pilihan opsyen berikut:-

Opsyen 1 : Serahan sekali setiap bulan;

Opsyen 2 : Serahan sekali setiap dua (2) bulan; atau

Opsyen 3 : Serahan sekali setiap tiga (3) bulan.

- (iii) Serahan bagi opsyen 2 & 3 perlu diperincikan dengan maklumat caj sumbangan kutipan yang diterima mengikut setiap bulan.
- (iv) Serahan terkumpul yang diserahkan tidak boleh melebihi tempoh tiga (3) bulan.
- (v) Serahan caj sumbangan kutipan perlu menggunakan BORANG PB-S **(LAMPIRAN C)** beserta maklumat inventori stok beg plastik perniagaan dan dikemukakan di kaunter bayaran PBT yang berkaitan.
- (vi) Serahan caj sumbangan kutipan perlu diserahkan secara tunai atau menggunakan cek atas nama **MAJLIS BANDARAYA PULAU PINANG** atau **MAJLIS BANDARAYA SEBERANG PERAI** mengikut kawasan premis perniagaan didaftarkan.
- (vii) Serahan caj sumbangan kutipan mesti diserahkan secara individu mengikut premis perniagaan yang didaftarkan menggunakan BORANG PB-S mengikut premis perniagaan beserta tunia atau cek bagi kutipan.
- (viii) Serahan caj sumbangan kutipan mesti dibuat mengikut waktu operasi PBT di lokasi berikut:-

(a) MAJLIS BANDARAYA PULAU PINANG

Pejabat MBPP
Paras 3, KOMTAR
Jalan Penang
10675 Pulau Pinang

Pejabat MBPP Balik Pulau
1, Jalan Tun Sardon
11000 Balik Pulau
Pulau Pinang

Pusat Bayaran Setempat MBPP
Jalan Padang Kota Lama
10200 George Town
Pulau Pinang

(b) MAJLIS BANDARAYA SEBERANG PERAI

Kaunter Berpusat
Majlis Bandaraya Seberang Perai
Jalan PERDA Utama
Bandar PERDA
14000 Bukit Mertajam

- (ix) Premis yang mempunyai lebih dari satu cawangan dibenarkan membuat serahan secara tunai atau menggunakan satu cek secara bersekali. Walau bagaimanapun, BORANG PB-S masih perlu diisi mengikut premis yang didaftarkan.

Contoh:-

Syarikat Z mempunyai lima (5) cawangan iaitu A,B,C,D dan E. Cawangan A, B & C beroperasi di kawasan MBPP dan Cawangan D & E beroperasi di kawasan MBSP.

Serahan kutipan bagi cawangan A, B & C perlu dibuat kepada MBPP menggunakan tiga (3) BORANG PB-S bagi setiap cawangan dan boleh disertakan dengan wang tunai atau satu cek untuk jumlah caj sumbangan kutipan bagi ketiga-tiga cawangan A, B dan C tersebut. Kaedah yang sama boleh digunapakai bagi serahan di MBSP.

- (x) PBT akan mengeluarkan resit sebagai bukti penerimaan serahan caj sumbangan kutipan beg plastik dari premis perniagaan. Bukti serahan caj sumbangan kutipan juga akan dijadikan syarat bagi memperbaharui lesen premis perniagaan.

6.3 PENGECUALIAN CAJ SUMBANGAN KUTIPAN

- (i) Premis perniagaan yang berdaftar dengan Kempen Hari Tanpa Beg Plastik Percuma dan tidak membekalkan beg plastik kepada pengguna perlu juga membuat serahan bulanan kepada PBT menggunakan BORANG PB-S dengan **deklarasi TIADA CAJ SUMBANGAN KUTIPAN**.
- (ii) Premis perniagaan yang menyerahkan BORANG PB-S dengan deklarasi **TIADA CAJ SUMBANGAN KUTIPAN** selama **tiga (3) bulan** berturut-turut boleh memohon kepada PBT bagi pengecualian daripada membuat serahan caj sumbangan kutipan secara bulanan untuk

bulan-bulan yang berikutnya dengan mengisi **BORANG PB-F (LAMPIRAN D)**.

- (iii) Semakan akan dilaksanakan oleh PBT di premis perniagaan yang mengemukakan permohonan pengecualian caj sumbangan kutipan bagi tujuan pengesahan bahawa premis perniagaan berkenaan tidak lagi membekalkan beg plastik kepada pengguna.
- (iv) Premis perniagaan yang telah disahkan tidak membekalkan beg plastik kepada pengguna akan diberikan **SIJIL PREMIS BEBAS BEG PLASTIK NEGERI PULAU PINANG (LAMPIRAN E)**.
- (v) Premis perniagaan perlu menyerahkan SIJIL PENYERTAAN PREMIS KEMPEN HARI TANPA BEG PLASTIK PERCUMA NEGERI PULAU PINANG kepada PBT sebagai syarat untuk digantikan dengan SIJIL PREMIS BEBAS BEG PLASTIK NEGERI PULAU PINANG yang perlu dipamerkan di premis perniagaan.
- (vi) Premis perniagaan yang telah diberikan SIJIL PREMIS BEBAS BEG PLASTIK NEGERI PULAU PINANG tidak perlu lagi membuat serahan caj sumbangan kutipan bulanan kepada PBT.
- (vii) SIJIL PREMIS BEBAS BEG PLASTIK NEGERI PULAU PINANG perlu diperbaharui setiap tahun oleh premis perniagaan setelah ianya tamat tempoh.

7.0 PENUTUP

- 7.1 Garis Panduan Penguatkuasaan Kempen Hari Tanpa Beg Plastik Percuma Negeri Pulau Pinang 2017 diwujudkan dan dikuatkuasakan berdasarkan kepada maklumat sedia ada semasa ianya dirangka. Kerajaan Negeri Pulau Pinang berhak meminda dan menambahbaik garis panduan ini sekiranya perlu berpandukan perkembangan terkini dan keperluan dari semasa ke semasa.

LAMPIRAN A

-CONTOH-

BORANG PB-A



PENDAFTARAN KEMPEN HARI TANPA BEG PLASTIK PERCUMA NEGERI PULAU PINANG

1. NAMA PERNIAGAAN :
2. NO. PENDAFTARAN : :
PERNIAGAAN
3. ALAMAT PREMIS :
4. PEGAWAI UNTUK :
DIHUBUNGI
5. NO. TELEFON : - 6. NO. FAX : -
7. EMEL :
8. JENIS PENDAFTARAN : PENDAFTARAN PERTAMA PEMBAHARUAN [SILA TANDAKAN (V)]
9. NO. PENDAFTARAN : (BAGI PEMBAHARUAN PENDAFTARAN SAHAJA)
KEMPEN
10. KOD JENIS PREMIS : (BAGI PENDAFTARAN PERTAMA SAHAJA)

| KOD JENIS PREMIS | |
|------------------|---------------------------------|
| H | Hypermarket |
| S | Supermarket |
| D | Departmental Store |
| C | Convenient Store |
| F | Fast Food Restaurant |
| P | Petrol Station Convenient Store |
| R | Chain Store |
| Y | Pharmacy |
| O | Others |

Untuk Kegunaan Pejabat:

- NO PENDAFTARAN :
- NO SIRI SIJIL :
- TARIKH TAMAT PENDAFTARAN: / /

.....
TANDATANGAN & COP RASMI

LAMPIRAN B

-CONTOH-

NO. SIRI :

**SIJIL PENYERTAAN PREMIS
KEMPEN HARI TANPA BEG PLASTIK PERCUMA NEGERI PULAU PINANG**

NAMA PERNIAGAAN : SYARIKAT SAAD & HUSAINI

NO. PENDAFTARAN PERNIAGAAN : P82761599

**ALAMAT PREMIS : NO. 1, JALAN 2, LINTANG PERMATANG 3,
65700 SEBERANG PERAI UTARA
PULAU PINANG**

NO PENDAFTARAN KEMPEN : SPU 2314 H

TARIKH SAH SIJIL : 1 JANUARI 2021 – 31 DISEMBER 2021

CAJ KUTIPAN : RM1.00 BAGI SETIAP HELAI BEG PLASTIK

**HARI KUTIPAN : KHAMIS, JUMAAT, SABTU & AHAD SAHAJA
ISNIN, SELASA DAN RABU TIADA BEG PLASTIK**

ADALAH DIMAKLUMKAN BAHAWA PREMIS PERNIAGAAN INI MERUPAKAN PESERTA DALAM KEMPEN HARI TANPA BEG PLASTIK PERCUMA KERAJAAN NEGERI PULAU PINANG. SEHUBUNGAN ITU, CAJ SUMBANGAN KUTIPAN RM1.00 YANG DIKENAKAN BAGI PENGGUNAAN SETIAP HELAIAN BEG PLASTIK OLEH TUAN/PUAN AKAN DISALURKAN KEPADA KERAJAAN NEGERI PULAU PINANG UNTUK KEGUNAAN AKAUN TABUNG AMANAH KEBAJIKAN NEGERI PULAU PINANG.

SEKIAN, TERIMA KASIH.



LAMPIRAN E

-CONTOH-

NO. SIRI :

**SIJIL
PREMIS BEBAS BEG PLASTIK NEGERI PULAU PINANG**

NAMA PERNIAGAAN :

NO. PENDAFTARAN
PERNIAGAAN :

ALAMAT PREMIS :

NO PENDAFTARAN
PREMIS :

TARIKH SAH SIJIL :

ADALAH DIMAKLUMKAN BAHAWA PREMIS PERNIAGAAN YANG TERTERA DI ATAS ADALAH PREMIS BEBAS BEG PLASTIK DAN MERUPAKAN RAKAN HIJAU KERAJAAN NEGERI PULAU PINANG. SEHUBUNGAN ITU, TIADA BEG PLASTIK YANG AKAN DIBEKALKAN UNTUK SEBARANG TRANSAKSI DI PREMIS INI.

